



LE GOUVERNEMENT
DU GRAND-DUCHÉ DE LUXEMBOURG
Ministère des Affaires étrangères
et européennes

Le Ministre

Luxembourg, le 26 août 2020

REÇU
Par Alf Christian, 11:07, 26/08/2020

Le Ministre des Affaires étrangères et européennes
à
Monsieur le Ministre aux Relations avec le Parlement

Je vous prie de bien vouloir trouver en annexe, la réponse conjointe de Monsieur le Ministre des Affaires étrangères et européennes et de Monsieur le Ministre de la Défense à la question parlementaire urgente 2684 posée par les honorables Députés Messieurs Marc Goergen et Sven Clement.


Jean Asselborn

**Gemeinsam Äntwert vum Här Aussen- an Europaminister a vum Här
Verdeedegungsminister op d'parlamentaresch Fro Nummer 2684
vum 19. August 2020 vun den honorabelen Deputéierten, dem Här Marc Goergen an
dem Här Sven Clement**

1. Huet sech d'Risikolag fir eis Zaldoten am Mali ënnert der EUCAP Sahel Missioun verännert?

D'Missioun EUCAP Sahel Mali ass eng zivil EU Missioun an där keng Lëtzebuerger Zaldote matmaachen. Allerdéngs ass säit dem 1. Juni 2019 e Lëtzebuerger Polizist un dëser Missioun bedeelegt. D'Lëtzebuerger Zaldoten huelen Deel un der Missioun EUTM Mali an un der UNO-Missioun MINUSMA. De Putsch am Mali huet eng problematesch Sécherheetssituatioun nach méi volatil gemaach, ouni awer dass d'Risikolag fir d'Lëtzebuerger sur place sech am Moment grondleeënd geännert hätt.

2. Plangt d'Regierung fir eis Zaldoten ze rapatriéieren oder op der Plaz ze loossen? Falls d'Zaldote sollten am Mali bleiwen, wéi eng zousätzlech Sécherheitsmoossname gi getraff?

D'Regierung plangt net d'Zaldoten ze rapatriéieren. Nom Putsch hunn d'Missiounen hir Memberen ugewisen an de Lageren ze bleiwen, d'Bewaffnung ass der Situatioun ugepasst ginn an d'Evakuatiounspläng gi Revue passéiere gelooss. D'Stroosse sinn am Moment roueg an d'Putschisten hunn ugekënnegt hir Kooperatioun mat den internationale Missiounen weiderféieren ze wëllen. Mëttlerweil ass den erhéichte Stade d'alerte och nees erofgefuer ginn an d'Militär dierfen hier Base fir essentiell Deplacementer verloossen.

De Lëtzebuerger Polizist, deen sech un der ziviller Missioun EUCAP Sahel Mali bedeelegt, befënnt sech de Moment zu Lëtzebuerg.

3. Huet de Minister Kenntnis dovunner wien am Moment am Mali d'Kontroll ausüübt?

Am Moment gëtt et keng Autoritéit, déi d'Kontroll iwwert de ganzen Territoire vum Mali ausüübt. Nom Oftrëtt vum President Ibrahim Boubacar Keïta huet de Colonel Assimi Goïta sech als President vum néi gegrënnte Comité National pour le Salut du Peuple (CNSP) den 19. August presentéiert. De Membere vum CNSP hiren Aussoen no hunn si keng politesch Ambitiounen mee wëllen op eng schnell, politesch an zivil Transitioun hischaffen. Hiren eegenen Aussoen no hunn si och kee Lien mam Oppositionsmouvement M5-RFP (Mouvement du 5 juin – Rassemblement des forces patriotiques), eng Koalitioun aus zivilgesellschaftlechen a reliéise Beweegungen, déi scho säit e puer Méint d'Demissioun vum President Keïta gefuerdert hat. Den M5-RFP huet deklaréiert dass si bereet sinn, mam CNSP zesummen un enger Transitioun ze schaffen.

4. Wéi ass d'Positioun vu Lëtzebuerg par Rapport zum presuméierte Putsch-Versuch am Mali?

Antikonstitutionell Mesurë kënnen op kee Fall eng Äntwert sinn op déi déif gesellschaftspolitesch Kris déi de Mali säit Méint duerchlieft. D'Militär muss d'Muecht un d'Zivilisten zeréckginn an dëse sozial-politeschen Transitiounsprozess muss zu demokratesche Wale féieren. Mir ruffen, zesummen mat der Europäescher Unioun, zu engem inklusiven Dialog am Mali op fir e Konsens ze erreechen deen déi demokratesch Verfassungsprinzippien, internationaalt Recht a Mënscherechter respektéiert. Dëst ass deen eenzege Wee fir déi weider Destabiliséierung net nëmme vum Mali mee vun der ganzer Sahel-Regioun ze vermeiden.